



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

ig tiryimym@aolima

yt tir yimym

TAPAK 8

PM Modi-i Port Blair nung Veer Savarkar
Airport terminal tasenba semzüksü

Jamshedpur FC-i Serbia nunger
asayar Alen Stevanovic alizükogo



VOL. XX NO. 276 (ADOK 276)

DIMAPUR RASEMNÜ (WEDNESDAY)

CHITENI (JULY) 19, 2023

₹ 5.00

Lucy Marem tepsetba atema MoU sign sütep Manipur sorkari Rs 20 lakh den sorkar mapa agütsütsü

Imphal, July 18, 2023 (Agencies): Manipur nung Lucy Marem tepsetba ken o atema Memorandum of Understanding (MoU) ka nung sign sütepo.

Mongulbarnü CM indang Secretariat nung Manipur Chief Minister N Biren Singh lia United Naga Council (UNC) aser Coordinating Committee on Manipur Integrity (COCOMI) tsüingda onük 7 aliba MoU nung sign sütep.

Iba MoU nung UNC president NG Lorho, COCOMI Coordinator Jeetendra Ningomba aser Secretary to the Chief Minister Ningthoujam Geoffrey nungeri sign asü.

Iba tenangzüktep nung state sorkari Naga tsür Lucy'er kibong nem Rs 20 lakhs teyari agütsütsü aser lar jala nem tekaratiba nung sorkar mapa ka agütsütsü nangzuka lir.

Chief Minister N Biren Singh aser tanga lennirtem lia UNC aser COCOMI tsüingda Maring Naga tsür ka tepsetba atema tangatetep kati aru.

Mongulbar nikongdang 5:00 ako nung UNC aser COCOMI tanishirtemi Chief Minister N Biren Singh den ajurutep. Iba mapang Transports, Veterinary

and Animal Husbandry Minister Khshim Vashum, Nungba Assembly constituency MLA & Hills Area Committee chairman Dinganglung Gangmei aser Chandel assembly constituency MLA SS Olish nungertem liasü.

July 15 nü Sawombung nung M Lucy (Maring Naga) tepsetba atema jashir ta UNC tanishirtemi ashi.

La ya Chandel district kübok Narun village nungi liasü aser Tengnoul district kübok Beaulalram, Pallel nung telidak liasü ta UNC tanishirtemi Chief Minister Biren Singh dang ashi.

Idangji COCOMI tanishirtemi iba tebilemstü khuret parnoki abenba den M Lucy tepsetba atema sasaa bilemba ashi. Parnokisa UNC-i anir Naga nunger dang tatok meshi.

Chief Minister Biren-ia iba tatalokba khukhua aitsü aser M Lucy'er kinungertem den UNC tanishirtem den mangyimba lemsatepba metetdaksü.

Lucy Maring tepsetba dak sendakba nung tetsür 5 dena nisung 9 pua lir. La tepsetba ya telok balalai aitsüogo aser Manipur kübok lendenlen aliba district tem nung lungkak aitiba sentongtem ayonga agiogo.

Minister Paiwang-i NH-702 semdang



July 18, 2023 nü H&FW Minister P. Paiwang Konyak aser tangartei NH-702 semdangba angur.

Mon, July 18, 2023 (TYO): Health & Family Welfare Minister P. Paiwang Konyak-i PWD (National Highway) dang Mon village ajanga süiba lenmang anepalutsü tayongzükba agütsü. Tanü Minister Paiwang-i NH-702 Mon-Namtola lenmang raksaa alidak semdangdang iba temepishiba agütsü.

NH-702 nung lenmang anenoka aliba aser raksaba NHIDCL-i yangludar aser tanü Paiwang-i NHIDCL dang Mon-

Tizit National Highway jungjunga anepaluba den ali anenoka aiba tesem nung lenmang ulushitsü ashi.

"Tzüngluruwa mapang gari lenmang raksaba timtem nübortemi arema atatsü mepishir aser tekaraba nung lenmang lapoktsü atema mapa inyakdar" ta paisa metetdaksü.

Tanü PWD (National Highways), NHIDCL, district aser police ketdangsurtemi Minister Paiwang meina ao.

2024 general elections nung PM Modi aser I.N.D.I.A raratsü

New Delhi, July 18, 2023 (Agencies): India nung

opposition teloktemi 2024 general elections nung külemi yaritepsü atema longjemogo aser parnoki iba teloktep dang I-N-D-I-A (Indian National Developmental Inclusive Alliance) ta ajatsü lemtetogo.

Mongulbarnü Bengaluru nung opposition telok 26 tashi adenshia senden amendang iba tenüing ajatsü lemtet. Külen, Congress lennir Rahul Gandhi-i 2024 general elections raraji "Modi versus I.N.D.I.A" asütsü ta ashi.

"Iba rara ya India tangatetba ana indang lir. Linük indang ola nembangsur. Iba rara ya linük indang ola atema lir. Anungji onoki I.N.D.I.A tenüing shimtet" ta Rahul-i ashi.

Külen, BJP-ia Delhi nung NDA nung yaritepba telok ajak jatepa senden amen. Idangji BJP lennir Amit Malviya-ibo ozüingi noktanga aliba telok SIMI den I.N.D.I.A medemdanga jembu. "UPA melena parnok tanga tenüing ka kübok lokteper" ta Malviya-i ashi.

"2024 nung linüki Prime Minister Modi lennir asütsü shimtsü. Pei atema bilemba, ochimashi aser kibong kati dang yimsü asüba teloktem nem asen linük tarutsü anir moudaktsütsü. Parnok ya nübor tenzüksü atema masü saka parnok telok samaa aoba nungi küzmüksü atema külemi longjemer" ta paisa metetdaksü.

Opposition teloktem anogo ananü tashi senden amendang Left party temi 'Alliance' nungi 'Front' ta melennüa liasü, telok kari tenüing nung 'NDA' melidaktsünüa liasü aser Shiv Sena UBT tanishir Uddhav Thackeray-i tenüing nung opposition ta melidaktsütsü ashi.

Senden nung Rahul Gandhi-i I.N.D.I.A nungja benokba agizük.

Iba tenüing amshitsü lemtetba sülen Trinamool Congress lennir Derek O'Brien-i "Chak de India" ta metetdaksü.

"NDA nenoki INDIA jazüktetsü asü? BJP nenoki INDIA jazüktetsü asü?" ta West Bengal Chief Minister Mamata Banerjee-ia ashi.

Osang angazükba agi Bihar Chief Minister Nitish Kumar-ibo I.N.D.I.A nung NDA ojangtem aliba atema nunnganga liasü saka pa mesüzük.

"BJP-i CBI, ED, vigilance aser item amala rejutem amshia democracy, Constitution samatsütsü meranger. Parnoki CBI, ED, vigilance nem opposition party lennirtem aser züngsemtem anema mapa inyakdaksür. Iba tensa ya kanga majung aser iba tensa nungi küzmüksü atema onok longjemogo" ta Congress president Mallikarjun Kharge-i ashi.

Iba teloktep ya shibai len anitsü ta osangbeneri asüingdangdang "Onoki züngsem 11 aliba coordination committee ka tentetsü. Mumbai nung senden amendang züngsem 11 shimtsü aser Convenor inyaktsü nübo shimtsü" ta pai langzü.

Bengaluru nung opposition senden amendang Delhi nunga NDA senden amentsü ayongzük aser iba nung BJP-i party 38 tashi anidena liasü.

"BJP-i tsübur. Tesüiba nung BJP-i hao ta melii toktsür, tanga teloktem den o mejembu. NDA loksar liasü saka tangbo PM-i NDA teloktem anidentsü meranger. Iba ajanga pai Opposition tsüububa sayur" ta Congress president Kharge-isa ashi.

NDA senden nung adenba political party tem indang asüingdangdang "Parnok ya shirnokar memetet. Parnok ya registered parties asüningbo, nibo India nung party paika ya aliba memetet" ta Kharge-i langzü.

Delhi nung NDA senden nung adenertem:

1. BJP, 2. Shiv Sena (Eknath Shinde faction), 3. Nationalist Congress Party (Ajit Pawar faction), 4. Rashtriya Lok Janashakti Party (Pashupati Kumar Paras), 5. All India Anna Dravida Munnetra Kazhagam, 6. Apna Dal (Soneylal), 7. National People's Party, 8. Nationalist Democratic Progressive Party, 9. All Jharkhand Students Union, 10. Sikkim Krantikari Morcha, 11. Mizo National Front, 12.

- Indigenous People's Front of Tripura, 13. Naga People's Front, Nagaland, 14. Republican Party of India (Athawale), 15. Asom Gana Parishad, 16. Pattali Makkal Katchi, 17. Tamil Maanila Congress, 18. United People's Party Liberal, 19. Suheldev Bharatiya Samaj Party, 20. Shiromani Akali Dal (Sanyukt), 21. Maharashtrawadi Gomantak Party, 22. Jannayak Janta Party, 23. Prahar Janshakti Party, 24. Rashtriya Samaj Paksha, 25. Jan Surajya Shakti Party, 26. Kuki People's Alliance, 27. United Democratic Party (Meghalaya), 28. Hill State People's Democratic Party, 29. Nishad Party, 30. All India NR Congress, 31. Hindustani Awam Morcha HAM, 32. Jana Sena party, 33. Haryana Lokhit Party, 34. Bharath Dharma Jana Sena, 35. Kerala Kamaraj Congress, 36. Puthiya Tamilagam, 37. Lok Jan Shakti party (Ram Vilas Paswan), 38. Gorkha National Liberation Front.

Bengaluru nung Opposition senden nung adenertem:

1. Indian National Congress, 2. All India Trinamool Congress (TMC), 3. Dravida Munnetra Kazhagam (DMK), 4. Aam Aadmi Party (AAP), 5. Janata Dal (United), 6. Rashtriya Janata Dal (RJD), 7. Jharkhand Mukti Morcha (JMM), 8. Nationalist Congress Party (NCP) Sharad Pawar Group, 9. Shiv Sena (UBT), 10. Samajwadi Party (SP), 11. Rashtriya Lok Dal (RLD), 12. Apna Dal (Kamerawadi), 13. Jammu and Kashmir National Conference (NC), 14. Peoples Democratic Party (PDP), 15. Communist Party of India (Marxist), 16. Communist Party of India (CPI), 17. Communist Party of India (Marxist-Leninist) Liberation, 18. Revolutionary Socialist Party (RSP), 19. All India Forward Bloc, 20. Marumalarchi Dravida Munnetra Kazhagam (MDMK), 21. Viduthalai Chiruthaigal Katchi (VCK), 22. Kongunadu Makkal Desia Katchi (KMDK), 23. Manithaneya Makkal Katchi (MMK), 24. Indian Union Muslim League (IUML), 25. Kerala Congress (M), 26. Kerala Congress (Joseph).

Dr. Ato-i par Constituency nung sorkar school aser CHC ajak semdang

Kohima, July 18, 2023 (TYO): 9-Kohima Town Assembly Constituency MLA Dr Tseilhoutuo (Ato) Rhutso-i Mongulbar nungi par Constituency nung aliba sorkar school aser health centre tem semdanga aoba maparen tenzükogo.

Tanü Dr. Ato den National Peoples' Party (NPP) ketdangpurtemi Government

Primary School & Government Middle School aser Naga Bazaar Colony nung Sub-centre (Health) semdang.

MLA Dr. Ato indang mangdang ama iba mapa inyaker. Pai tekaratiba nung constituency kübok aliba sorkar school tem aser CHC ajak semdangtsü MLA indang PRO-i ashi.

Kaketshirtem, tesayurtem aser health workers indang khurettem

metetsü atema pai sorkar school aser CHC semdanga aotsü aser item onüktem bangdakpur dangi abentsü ta PRO-isa metetdaksü.

"Shisaliok rejutem aser health centre ajaki kaketshirtem aser public yaritsü atema bendanga agütsütsü mepishir. Kü constituency kübo aliba shisaliok rejutem aser health centre ajungkettsü atema akokba tashi ni yaritsü" ta Dr. Ato-ia ashi.

CRS atema Kohima DLCC senden amen



Deputy Commissioner, Kohima indang Office Chamber nung nung July 17, 2023 nü DLCC senden amendang tangokba noksa ka nung Deputy Commissioner, Kohima aser District Chief Registrar, Shanavas C IAS den ketdangsürtem angur.

Dimapur, Chiteni/July 18 (TYO): Asoba aser asüba awajema Civil Registration System (CRS) atema Kohima District Level Coordination Committee senden ka July 17, 2023 nü Deputy Commissioner, Kohima indang Office Chamber nung mena liasü.

Iba senden nung Deputy Commissioner, Kohima aser District Chief Registrar, Shanavas C IAS menden liasü aser pai Economics & Statistics Department dang tasoba aser tasüba (Births and Deaths) registration tejangja osang kaket nung ajungtsü, ta shia liasü.

Nüburtem dang mapang shidak nung tanur asoba aser asüba indang tenüng züluoktsü asoshi awareness sentong tali ayongzük nung ajungtsü aser iba system junga inyaksü asoshi sendaktepa aliba department tem amalitep akatsüla, ta pai ashi.

Iba sentong nung Chongti, FI, District Economics & Statistics Office Kohima ajanga Kohima District kübok Births & Deaths indang osang tongmelang agi agüja liasü.

Nuso tasen indang dak alia asüba indang department nem osang shidak magütsür, aser iba yongji data bendenba shidak masür, ta Chongti-i ashi.

Chongti-i Deputy Commissioner dang Kohima district kübok aliba office ajak dan tasüba osang pei department nem metetdaksütsü ajungshia osang sangdongtsü mepishia liasü.

Iba senden nung Registrars shimtsü aser Online Registration indang onüktem jembia liasü.

Kohima district nung Registration Units 129 aser Registrars 17 lir. Public Registration (Online Registration) atema tejangrar temi "crsorgi.gov.in" nung log in sür documents tejangja agüja registration sütettsü.

SDO (C) Mon ajanga nüburtem dang saksalema alitsü ayongzük

Dimapur, Chiteni/July 18 (TYO): Nagaland State Social Welfare Board, Nagaland, Kohima nungi osang aruba ama ashikülaker (scammer) temi PMMVY Office nungi ketdangsür ama call süa mesüra text message yoka bank account

tem temelaba makai amshitsü (hack) merangba nungi Mon district nung aliba nüburtem jenbua aser saksalema alitsü SDO (C) Mon, Rongsenmenla, NCS ajanga metetdaksü.

Item call ya PMMVY cell nungi masü aser kodanga phone

ajanga bank account details memeshir aser QR codes tem meyoker. Iba call arur temi District Hub for Empowerment of Women (DHEW) nem osang agütsütsü mesüra Women Helpline den 9485239098 ajanga jembitsü akok, ta ashi.

Department shia Medical Reimbursement atema metetdaksür

Dimapur, Chiteni/July 18 (TYO): Directorate of Health & Family Welfare ajanga sangdong ka nung ashiba agi, Chief Minister Health Insurance Scheme (CMHIS) mapa kuma meinyakdang November 1, 2022 masüdag temang anepalu tenzükba aser Medical Reimbursement (MR) claims tem pei-pe department

ajanga timi jangjatepba sülen agütsütsü.

Ajisüaka November 1, 2022 nungi CMHIS mapa kuma inyaka aoba sülen MR bills tem magizüktsü.

Iba sangdong yagi taoba mapang sorkari sangdongba aser Directorate ajanga metetdakja aliba melener, ta sangdong ajanga ashi

DC Mon ajanga nüburtem dang saksalema alitsü metetdaksür

Dimapur, Chiteni/July 18 (TYO): Meyi mapang tzünglu kanga sashia arutsü teimla nung Deputy Commissioner, Mon, Ajit Kumar Verma-i July 18, 2023 nü nüburtem dang kumdanga alitsü metetdaksü.

sashia aruba mapang nüburtem anentsüh alutsüla tesem nungi pila alitsü, jana arakzüba, süngdong süksaba mesüra long longzüka aluba ola kanga junga anga alitsüla, ta ashi.

District nung tenemlen tzünglu kanga sashia aruba ajanga tzü atsüngdenba, ajungben tzümetsüng adokba, anentsüh aluba aser ayong nung tzü tali ayimba alitsü.

Ayongnu nung tzü ajungbena tali akumba mesüra tzü temürek nungi menena akumba metettsüla.

Anungji jelia mera agir ama nüburtem dang anentsüh alutsüla tesem leni maotsü, ayongkum nung picnics, ango apui mesüra tzü dak sendakba maparen meinyaksü, süngdong tulu kübok mejenoktsü ajungshir, ta DC ajanga ashi.

Deputy Commissioner ajangasa Area Administrative Officers, Heads of Offices, Village Disaster Management Authorities (VDMAs), Village Council Chairmen, Head GBs, GBs aser Ward Authorities tem dang jelia mera agia alitsü aser alimar lendong ajanga timtem bener arutsüba mapang yariteptsü renema alitsü tuyu.

Pai nüburtem dang tenem nung aliba lenmang len saksalema senzütsü, lenmang poksar aliba ajitetra ketdangsür nem osang agütsütsü ajungshi.

Aser lendong timtem ajurura District Disaster Management Authority (DDMA) Mon nem Mobile Number +919366748416 ajanga osang agütsütsü metetdaksü.

Tzünglu tanen makai kanga

Tzüla ayong wazüka ayutsü angazükshi



Dept of fisheries and aquatic resources director, Rongsennungba-i Tzüla ayong nung angu janu chiokba mapang tangokba noksa nung angur. Mokokchung, 18th July, 2023

Mokokchung, 18th July (TYO): Tzüla (Dikhu) Green Zone Project Management Committee den külemi yaritepa department of fisheries and aquatic resources, Govt. of Nagaland-i 'awareness on river ranching program' ta sür ayong memeneni yangji aliba ango aser tanga shirurutem wazüka ayutsü asoshi angazükshiba sentong ka Tzüla ayongküm Tzüla (Dikhu) Green Zone Recreational Point nung ayongzüka kaogo. Iba sentong den külemi ano department-isa Tzüla nung angu rendaktsütsü asoshi ango janu lakh 4 dak tali chioka liasü.

Iba sentong nung shisalen sayur Dept. of Fisheries & Aquatic Resources, Director, Rongsennungba-i jembidang, tanü alima tzü mopung tsüka akümba tebilemstü ajuruba mapang ka, alima nem teyari agüja nükla tajung nung yimnasangeri tzü mopung wazüka ayutsü asoshi iba mapatong tenzükba asoshi pelaba metetdaksü. Iba mapa ajanga asenoki alima asoshi langka tajung inyakba nung shilem agir asütsü, ta pai tenüngsang agütsü.

Tanü alima tatsükba küma aoba ajanga alima tzü mopung

balaka melenshiogo, ayong nung tzü akonger, meilongi temperature teimba akümer, tashitak balala pokteter, anungji, asenoki arem aser ayongtem kümzüka aser wazüka ayuba ajanga alimaji telinütsüka kumdaktsütettsü, ta pai ashi.

Ayong ka alibaji temoatsü tulu. Tzüla (Dikhu) ayong ya Nagaland nung tongtibang ayong rongnung ka aser ibai tarutsü nung ngujem (scope) aliba ayong lir, aji oda, ayong aliba tajangzükji aika lir, ta pai kuli kar dena ashi. Iba ayong ya lanu putu asoshi shisa tarok bushidak (research centre) ka

kumdaktsütet aser iba tesem ya raliwalir adenshidak 'fishing eco-tourism' ka kumdaktsütsü merangtsüla, ta paisa shisem.

Paisa inyakdaksünüba o kar lemsatepdang, ayong nung tim mesüi miim mozü/electric kol/tapoktsü balala amshia ango apuba (unethical) inyakyim mesüra ango talitabong apuba itemjibo khenyongi noktangtsüla. Miim mozü amshia ango pur achiba jagi asenok tashitak dang tali buludaktsür, ta ashi.

Saka ango timi apuba (ethical fishing) tatishitsü agi; miim mozü mamshii aset atangba, fishing net agi apuba, angeling amala benshitsü akok. Iba jagibo ayong memenendaktsür saka temetettsü kaji ango metsüba mapang (breeding season) nungbo angoji khenyongi maputsüla, kechiaser iba ajanga ayong nung ango ajema kumdaktsür aser ibaji asenoksa akoksar, ta paisa tekümdangtsü olen ka shisem.


Tzüla ayong ya ngujem tulu aliba ka asünung, ayong ka wazüka ayuba nungji temoatsü jenti sentaka lir, anungji, iba ayong ya asentenshia yimnasangeri asalentong tajung kar yanglua tang dang nungi

tajungba wazüka ayutsü asoshi paisa ayongzük.

Sentong nung TGZPMC mendenbuba - Imliyanger, Ungma Village Council Chairman - Nungshilepden, Longsa Village Council Chairman - Talichuba, TGZPMC finance secretary - Temsutoshi, Mokokchung Town Longsa Senso Telungjem tir - Moludongba; Ungma Senso Telungjem Mokokchung tir - Sangkong parnoki shilem balala agi. Iba sentong nung Longsa aser Ungma yimtiba nungi yimden yimsüsürtem, Mokokchung town nungi yimnasanger senso telungjem, TGZPMC züngsemtem, department nungi ketdangsürtem aden.

TGZPMC ya Longsa-Ungma nati alima tzü mopung wazüka ayutsü nükjidong yur 6th April, 2010 nung tenzük. Wazüka ayuba ayongji kilometer 14.5 shi lir. Tang tashibo iba tesem nung ango mepudaktsür, shikari mesüdaktsür, sü/gari m e s h i t o k d a k t s ü r , mechigudaktsür mesüra alima tzü mopung menenba mapa kecha meinyaksü oziung tesashi yanglua kar, tashi mangartem senchi tulu agir.

Opposition alliance nungja 'INDIA' agütsüogo



July 18, 2023 : NCP tekolakba Sharad Pawar den CPI General Secretary D. Raja, Congress lenir KC Venugopal, DK Shivakumar aser tangartem Bengaluru nung opposition senden nung adeni aruba mapang tangokba noksa nung angur.

New Delhi, Chiteni/July 18

(Agencies): Opposition party tem longjemer I-N-D-I-A mesüra Indian National Developmental Inclusive Alliance ta nungja agütsür alliance ka tentetogo.

Parnok ya 2024 Lok Sabha elections nung BJP-i aniba National Democratic Alliance den tokteptsü atema longjemogo. Iba alliance nung züngsem 11 agi kümtetba coordination committee ka amenokogo aser iba committee yagi menden lemsatsüba aser alliance nungi PM atema candidate shimtsüba amala tongtibang ken o tem telemtetba agitsü.

Bengaluru nung tanabuba 'unity meeting' amenba mapang opposition party 26 yagi alliance nungja INDIA agütsütsü asoshi mulunga agizüka liasü. Iba nungja ya Congress lenir Rahul Gandhi-i benokba lir. Opposition party tem tasembuba senden Mumbai nung amentsü

telemtetba agiogo.

"Rara ya joko INDIA aser NDA na tsündga asütsü," ta senden tembangba sülen Rahul Gandhi-i ashi. "India indang idea ya BJP indang ideology agi amaker," ta paisa ashiba den, "rara ya party balalai kümtetba telok ana tsüngda lir saka rara ya India indang idea kümzüka ayutsü atema lir. Nenoki India puti otsü repringdangra shingaia India indang idea anema takok ngua raraba mangutsü. Iba ya India indang idea aser Narendra Modi na tsüngda rara ka asütsü," ta shisem.

West Bengal chief minister Mamata Banerjee-i ashiba agi, INDIA-i BJP tsükdaktsütsü. "Senden kanga takok ngua menogo aser shidakba inyakym tanü nungi tenzütsü," ta TMC lenir-i ashi.

Opposition alliance nungja agütsüba indang asüngdangba mapang, "ni BJP aser NDA dang nenoki INDIA challenge sütetsü asü ta asüngdangner,"

ta ashi.

"Linük kümzütsü aser BJP puri tesempatem adokdaktsütsü atema nüboyimba anema raratsü asoshi party 26 longjemogo," ta Delhi chief minister Arvind Kejriwal-i ashi. "Taoba küm 9 tsüngda PM Modi-i mapa aika inyakteter lila saka pai sector ajak raksatsüogo. Onok idaki onok ajangzütsü atema adenshiba masü saka tesempatem nungi linük kümzütsü atema adenshiba lir," ta Kejriwal-i ashi.

Shiv Sena (UBT) tekolakba Uddhav Thackeray-i, dictatorship anema tang linük ajunga longjemer ta ashi. "Linük ya asenok kibong lir aser onoki iba atema rarar," ta Thackeray-i ashi.

Alliance shiba lenisüba nung inyaksangshitsü ta asüngdangba mapang Congress tir Kharge-i, coordination panel convenor aser züngsemtem ya Mumbai nung senden amenba mapang shimtsü ta ashi.

Kohima Aor Pensioner Telongjem Mezüing Inti Senden Sentong

ANOGO- July 25, 2023 | MAPANG ANÜNGDANG -11:00 ako

TESENTEPDAK Jubilee Memorial Centre, Lerie

Menden : *Keldangfurtem*

- Sarasademtsü : Rev. M. Asangba Longkumer
- Menden Okila : Dr. Watijungshi, Tir KAPT
- Tepela O : Wb. Yanger Aier, Tir Kohima Aor Telongjem
- Tayongzüka O : Wb. T.N. Mannen, IAS (Rtd.) Hon'ble MLA & Advisor, Land Revenue, Law & Justice, GoN.
- Temeja Ken : Wb. Chiden Yaden, Rtd. Director Employment & Skill Development
- Onük : Retirement Sülen Taküm Tenzüker (Life Starts at Retirement)
- Tejembir : Wb. Alemtemshi Jamir, IAS (Rtd.)

KAPT Temzüing benoka agizüka mapang

Tatem Sarasadem : Dr. L. Watikala, Rtd. Principal Director, Health & FW

TEMETETSÜ

1. Kohima nung Aor Pensioner ajak iba sentong nung arua atentsü metetdaktsür.
2. Sentong temer lokti chiyong mapang alitsü.
3. Iba sentong takok ngudakjang ta ajaki sarasadema atadi.

NATIONAL EDUCATION SOCIETY FOR TRIBAL STUDENTS (NESTS)

(An autonomous organization under Ministry of Tribal Affairs, Govt. of India)
Gate No. 3A, Jeevan Tara building, Parliament Street, New Delhi-110001

EKLAVYA MODEL RESIDENTIAL SCHOOLS STAFF

SELECTION EXAM (ESSE) - 2023

National Education Society for Tribal Students (NESTS) ya Ministry of Tribal Affairs, Government of India kübok autonomous organization ka lir aser parnoki linük ajunga nung Eklavya Model Residential Schools (EMRSs) atema teaching aser non-teaching staff tem shimtsü asoshi online applications benoktsü jaokogo. ESSE-2023 atema online application, educational qualifications, teaching experience (wherever applicable) aser tanga eligibility criteria tem ya Information Bulletin nung lir koba www.emrs.tribal.gov.in ajanga lapoka repringtettsü. Mapa atema tejangrartem aser temsüa alirtemi 18.08.2023 (up to 23:50 Hrs. by submitting application form prescribed thereon) tashi nung online ajanga apply sütetsü. Mapa tem indang osang tejangja Information Bulletin nung angutsü.

Osang tejangjaba agitsü atema candidates tem dang www.emrs.tribal.gov.in semdangtsü metetdaktsüogo.

CBC 43107/12/0009/2324

PM Modi-i Port Blair nung Veer Savarkar Airport terminal tasenba semzüksü



Narendra Modi

New Delhi, Chiteni/July 18 (Agencies): Ato Kilonser Narendra Modi-i Mongolbarnü Andaman Nicobar Islands nung Port Blair kübok Veer Savarkar International Airport indang integrated terminal building tasenba virtually semzüksüogo.

Union minister for civil aviation Jyotiraditya M Scindia-ia iba sentong nung shilem agia liasü.

Iba terminal building tasenba ya sen crore 710 intoka yangluogo aser iba yagi küm nung passenger lakh 50

achaayangtettsü.

Port Blair nung airport facilities atsülanga aotsü tejangraba aliba indang jembiba mapang PM Modi-i, tang aliba terminal yagi alimapenzür 4,000 achaayangteter saka terminal tasenba yagi 11,000 achaayangtettsü, ta ashi.

"Tayimtsü aser alima penzür timba aruba ajanga iba tesem nung mapa timba adokdaktsütsü. Port Blair indang terminal building tasenba yagi senzusenpongtsü tayongba kümdaktsüba den shishilembatsü aser sendakteptsü tayongba kümdaktsütsü," ta pai ashi.

PM Modi-isa, terenlok asoshi model ji ajak asoshi lir kong tesem ajak terenlok, lokti nung ajak terenlok aser education, health aser connectivity amala taküm nung lenla ajak terenlok densema lir, ta ashi.

Ato Kilonser-i ashiba agi, taoba sorkari Andaman and Nicobar nem budget 23,000

agütsü saka tang sorkari 48,000 shi agütsüogo.

Kasa mapang nung terminal building tasenba takok ngua yanglutetba atema Jyotiraditya M Scindia-ia tenüngsang agüja liasü.

Paisa, iba airport dak alia Shibpur, Car Nicobar, aser Campbell nunga airport asem yanglutsü aser iba den Shaheed Dweep, Swaraj Dweep, aser Port Blair nung sen crore 150 intoka India sorkari water aerodromes pezü yanglutsü ta metetdaktsü.

'Congress aser Baghel-i SC, ST lokti ashioktsür: Malviya

New Delhi, Chiteni/July 18 (Agencies): Bharatiya Janata Party indang Information and Technology Department In-charge, Amit Malviya-i Mongolbarnü, caste certificates taila agütsüba dak sendakba nung Chhattisgarh yimtiba nung nüburtemi longkak aitba anema Chhattisgarh sorkar aitsüogo.

Iba longkak aitba indang

video ka dak sendakba nung tweet asüba mapang Malviya-i, "Chhattisgarh Vidhansabha monsoon session tenzüka anogo SC/ST lanurtemi caste certificates taila bener sorkar mapai aiba anema state yimtiba yimlong nung langsa longkak aitba sentong ayongzüka agiogo," ta ashi.

"Congress aser Bhupesh Baghel-i maneni SC aser ST loktitem ashioktsüogo," ta pai shisem.

Caste certificates taila bener sorkar mapai aiterem anema jenjang tapet agitsü khanga teburtem telok kati Chhattisgarh yimtiba Raipur nung longkak aita liasü. Lanurtem shirnok Scheduled Castes aser Scheduled Tribes lokti nungi lir parnoki süoshi kecha masem assembly session agia aliba tesem leni ao. Parnoki caste certificates taila amshirtem anema jenjang agitsü kanga yimyim ayimba den placard amer longkak aita liasü.

Parnok yagi VVIP garitem

arishiba dena nguogo.

Ajisüaka longkak aiterem ya yimya masüba nung longkak aitba atema Pandri police station kübok Ama Seoni anasa pua liasü.

PTI den sensaksemba mapang longkak aiterem rongnung kati ashiba agi, "taoba mapang onoki item nisungtem anema jenjang tapet agitsü atema lumia longkak aitago, saka onok takhangba mangashi. Anungji onoki langsa longkak aiter. Onoki caste certificate taila bener alirtem aputsü aser parnoki alidena aliba ali kimong, kiojen aser osettsütem sota ayutsü akhanger."

Chhattisgarh nung sorkar mapa atema caste certificates taila agütsüba ken o ya tawa kanga bulua kümdar. 2021 küm Public Works Department (PWD) executive engineer ka mapang nungi anenja liasü. Pai Scheduled Tribe (ST) caste certificate taila bener aliba ngutetba sülen mapa nungi anenja liasü.



TIR YIMYIM YIMOBILEM (EDITORIAL)

DIMAPUR RASEMNÜ, CHITENI (JULY) 19, 2023

Asenok ya tamachia na?

July 04 ya alima yimten otsü nung kanga tongtibang anogo ka lir, kechiyong 1776 küm iba anogo nung America nungertemi parnoksa Great Britain kübok liasüba nungi pila aser parnoksa alima dang America lima yimten nüchiso sangdong. Kasaji mesüaka, Nagaland nunga July 04 anogo ya tamamatsü anogo ka kümogo, kechiyong iba anogo nung ya Dimapur-Kohima National Highway 29 nung Chümoukedima anasa tenem kolaklen nungi long tulu mezüa alua gari kar toudak nung onshiba lendong nung nisung ana asü, asem yiru aser gari pezü kanga mejungi raksatsü. Atangji, iba lendong nung asüama aser takoksa angurtem nem government-i temenok ta mesüaka senotsü teyari terara agütsübabo angashiogo. Iba awashiji junger, kechiyong nisung asüba kechi agibo menoktettsü? Ajisüaka, Nagaland nung July 04 anogo nung atalokba lendong otsü yangji tatem makümer aser tamadoka mamadoker, kechiyong iba lendongji kodaser atalok ta bushisüngdangtsübjiang tongtibangba kümogo. Iba bushisüngdang nüngdakbaji lenmang inyaker contractor aser company-temi meshitak inyakba ajanga lendongji atalok asütsüa akok saka aibelener dak merenshitsuäba nükjidong nung masü saka ya ser tan July 04 nü ajuruba lendong amaji majurutsü atema kümdangshidakja lenmang yanglurtem nem lenmang tajung dang masü saka shitak yangludaktsütsü nükjidong asütsüla. Mapa nung aibelenba ajanga nisung taküm samatsüsa atalokba atema aibelener merenshitsuäbajibo shingaiäa longkak aita makangyonga ozüng agi ozüng amertemi pasasa inyaksüla saka meshitak inyakba ajanga lendong atalokba agi mapa shitak inyaksü tenzüktetra, iba jagi lenmang ajungba dang masü saka tarutsü nung memeteti nisung taküm aika kümzüksü. Nagaland tesem balala nung National Highway yangluba dak sendakba nung taoba mapang iba yimobilem nunga aiben lemsatepogo aser kari danga yangi lemsatepba ken o bener government nung alirtem den aser lenmang yanglurtem den ashishitepa ajungshitep nungbo July 04 lendong ya matalokla ta bilemer. Ajisüaka, asenok asoshi metongshiteptsübjai temenu masü, kechiyong tang asenok dak matalokji ta asenoki züzüa bilemra, ashiko, asüngbo asen dak ataloktsü. Iba amaji mataloktsü atema state government-ia lenmang yanglurtem den jembiba angashiogo aser yimten telok ana RPP aser NPF natia iba lendong atalokba kuli tejangja bushia ozüng nung aliba ama inyaksü takangba agütsüogo. Itemji government anema adokba ola masü saka mapa timi mesü inyakba ajanga asüama lendong atalokba anema lir ta angateta tim teinyaktsü inyakra, ajak asoshi tajung asütsü. Atangji, nisung süogo aser iba lendong anema yimten teloktemia government nem takangba agütsüogo aser osangkaket balala nunga nübortem den shisalemsatepogo. Ashiko, Nagaland nung alir Naga nungertem asoshiho aji tatem asütsüa akok, kechiyong shingaiäa item ken o ji jepzüka ola madoktsü, anungji ita ishika lir amadoktsü aser lenmang yanglurtemi tekaraba nung lenmang renema yutsü aotsü. Iba amaji Nagaland nung alir Naga nungertemi ola koka madokba ajanga ola madok ka khen, ka khen ta maparen tapu balala nung meteta aser memeteti akoksadagi. Tesasatsü kaji, Naga nung asoshiho National Highway 2 lane aser 4 lane yangluba ya teti asoshi asenok lenmang tesadamba aser tajungba nung lendong nungi kümzüka senzütsü atema masü saka alimenok (land aser property compensation) aser Commission tilaka angutsü atema inyakdaksür amai bilemer. Ibayongji, kasa National Highway-sa süaka asen lima nung tilaba aser meshitakba inyakba tesem aika nung repringtettsü. Tanga lima nung senzüdangertemibo pi lima tenemtsüng nung gari lenmang koda topur junga yanglur nga lir. Tenem lima asünungji tenemtsüng nung lenkalen litembang talang ser nung wapetsa (slope) masü saka indangindanga tsüngdangertem yutsüra, kodaser tenem kolaklen nungi long aser anentsü malutsü? National Highway 2 lane asütsüa akok saka gari anata junga metsüiteptettsüsa yanglutsüra, kodaser lendong majurutsü? Ola madoker nisung dang tamachi ajar, ashiko, asenoki nga asenok atema meshitak inyaksüaka asenoki ola koka madokba agi lenmang yanglurtemia asenok ya tamachia ta bilemer asütsü! Aji oda, shibaibo tamachi purtem asoshi mapa shitak inyaka toktsütsü?

OLEMSABANG

OTZÜ BUSHIANG BAZAR NUNG MANGUR

- S. Nuken Longkumer,
Naga United, Dimapur

Tsüngremi alima yangludang takar aser tulurtem ayutsü renem, Chubatem yimlitem ayutsü pa sentong nung yanglu. Otzü rajemtsü atema nungtugo taküm amshidi. Mr. Modi ama, S.C. Jamir aser N. Rio CM. ama yagi nür kidangi sen aputsü, jang apujang ta kodanga marutsü. Saka tasü yepdenbo kadang. Yamaji Tsüngremi iba lima nung renem. Taküm tatsüka alidang timtem lima nung alir yaritsü nü tangatetba alitsüla, ibaji kong ajurutsü? Nai Tsüngrem O bushitsüla. Ni kaket aika dang züngshiogo, tepelem nung alima ajunga nungbo otzü zulurtemji lakh 50 shibo alitsü südi, otzü balala tajangshiba balala tatalokba balala, shingai shinga maitsür, otzübaji dang angatetsü merangang, alima nung kaket zülur aser O jembiteter ya atamata nisung masü, parnoki alima ajak arakzüdaktsür.

Ans: Asen lima nung yi temenensa tulutiba asütsü, tanungba temenenjibo kecha masü. Teraksa mapatem zünger mezüngma toktsür, yi rara atema jembibaji ya, Kibong raksar, tiazü jembir, nuktapangtar aser japujari asür. Takum ya arishi tatsüba kümdaktsür ano aika lir, ano cari anidang lendong ajurur, tamashi shia jemrapang mozü tajung saka aiben teraksa ajurur. Alima asoshi yi ya rongsen tulu lir, mangateti achiba, otzü aika lir. Ozü yimdak asentenshi nung temulung meyiper arua par atsü nung aliba kozü dong 80 shi ka tsüngdok, oset tajung aika lepsa-a endok, temenen oset ta bilem. Tanü la aser par kibong tia majung lir, oset ji tai masü. Surapang Naga lima nung RCC zünger mezüngma lir, ochishia bena aruba agi yangluba yabo tai maka na? Yi nem dang tai ajak agütsür. Ita sen agi yangluba ya koda? Takartem lir, meranga inyaker aser yanglu. Ochishir takartem aika sensaker asoshi moaja lir.

Q:- Aen Aoen ajak agi MLA (11) lir, nenok lungjemtsü tasak akümer asü, nenok rongnung shiba shisa taka asütsü? Kechiaser nenok temeim raksatsütsü rongsen jenti yokdagi, kati ka manemtep kümdanga MLA (11) sensaksema lir mali ta belemer. U.P State nung M.P 80 lir saka tangar sulen jajar.

Tsüngremi asen nem shisarama agütsüa doker ama sasatsür. S.C. Jamir mesendoki otzü jembiang aser asüngdangang, Pa ya Mosa ama lenir lir. Otzü angatetra shingai jashia mepilemstü südi. Tsüngrem tama südakjangma, Laishiba nung temapur tesü akümstü aser tesüpur tama akümstü ta ashiba o ya ochi lir.

Ans: India lima BJP Govt. ya kechi, iba ya telok ka dang lir, India lima telok aika lir, shir teloki temba bener aruteter iba jagi Govt. yanglur, idaki ABAM arogo nungertem matentsüla. Khristan aser Arogopurtemibo sarasadem nung dang yaritsüla. BJP Govt. marudang Khristantem eishikangshi aika ajurua aru. Laishiba jungkai adoktsü asoshi, Tsüngrem O anemerbo lendong tenük agi manguba mesen tena lir.

Q:- Asenok meimchir masü dang meimchir ama makümdang küm noklang aika tejaklen alimaji tesü mangtsü tatalokba otzü aika angutsü, aseni aika mangatetsü aser mongujemtsü, asenok yabo 1872 shi ka nung ang alima nung meimchir aliba aser inyakbaji tenük agi angur aser süngmanga repring südi. Yamaji iba lima merena soyapokya-a-tangar tashilemtet bushitepa aodang aiben timtem ajurur. Yashi na menden nung tulu nung amen, tanü tangartem nü menden nung amener, yamaji melentepa yimsü süa aodangbo tajung masü teraksa aser shisabulu ang timba ajuru, asenok atepzungnung Laishiba tepdaka melira nür room telungnung Tsüngrem O melira asenoki belemba inyakba jembiba ajak amajok akümstü, iba sülenbo tesurpurtem to temapur kümadoker atatsü, tanü asen putu nung aseni sayuteta ajungtsübapurtem temalen jajatsü tenzüka aobaji asen tenük agi angur aser Ak nem prem Hon ahutsüba ama küma odaki. Asenok meputepi aliba to tangari angateta arudar, iba sulen anonungdakra rongsen jendi indoka inyaksü sendong yangluba mapatemji angur, asen Aolima meima mali ama bilemteter, O Yabo kanga tanang telunglenbo leper ama teshinem tulu lir. Tesayur lima nung paper mill ka lapoka aliba samatsüogo, asenok Khristan tepang tanang tenla timba lir. Tanü Khristan taküm aika temeim tembabo nür kidang shibanger yua lir, kongi bener aotsü shipanger ayu? Nür semchirtem asoshi mesüra nür kipong tarutsü asoshi renem? Teraksa otzü aika lir, tekoro taküm kodanga nungtugo makümstü, nür kidang tangaroshi jembiba anenang, tetsü oshi peria lir, nür kidang tangaroshi jembiba jagi nupurtem aika menendaktsür, na America lima par oshi jembiang, asen lima nung kecha inyakteta maka sür tangar chilu amshia tangaroshi jembitsü kecha tajangzük mali.

1. Asen lima car yangludak kwika lir?
2. Asden lima süoshitem yangludak kwika lir?
3. Asen peritsüsa chiyongtsütem adokteter asü?
4. Asen lima sen yangludak lir mali?
5. Asenok ajak tai, asenok ajaki aibelena inyak.

Q:- Alima talang nung aliba otzü mejembitsüla saka asen anasa aliba Assam state nung lesson tajung agia tsuklu aser tenem nung ajungba sungjang lu amala yima kipolngtem mesütsü mamatsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



ABAM aser Kohima Ao Baptist Arogo na teyaritep nung Rev.L.Yapang Mollier aser Dr.Imsutoshi Lemtur na lenisüba nung, parnok nisung pungo tashi oagi Tseminyü Town Ao Baptist Arogo nung July 13 nungi 16, 2023 tashi Father School agiba mapang agiba noksa ka yangi angur. "Nenok nübo, rongsen, shisatsü aser sarasadem ajanga tanüla anir aruba sentong tajung katsüba asoshi arogoi kanga pelaba lemsateper. Tsüngremi ABAM aser KABA maneni moajangma," ta TTABA nung sannüker I.Anung Lemturi metetdaksüogo.

UP nung nisung kati Dalit kibong 230 temolung meyipdaksü, pa apu

Lucknow, Chiteni/July 18

(Agencies): Nisung kati shirang ajak nungi taneptsü agütsütsü nangzükba sülen Dalit nung kobong 230 tashi Khrista dangi temolung meyipdaksüsang Hombarnü police temi apu.

Tai tonglokja alisang Bajrang Rawat ya Lucknow nungi Khristan ka lir aser pa ya Lonikatra police station kübok railway indang ali ka nung küm ka shi lia aru, ta Additional Superintendent of Police (ASP) Akhilesh Narayan Singh-i ashi.

Par kidang nungi Laishiba aser danga Khristan kaket kar ngutet, ta Singh-i ashi.

Haidergarh jila nungi Vijay Hindustani-i ashishiba nung ajemdaker ken o ka Rawat anema Uttar Pradesh Prohibition of Unlawful Conversion of Religion Act, 2021 kübok ken o benoka lir, aser pa den yariteper tem jangjatsü meranger, ta ASP-i ashi.

Hindu nung telok ka nung activist Hindustani-i ashiba agi, pa den dangar activist kari iba tesem semdangba mapang yangji Hindu tsür aika angu.

Hindustani-i ashiba agi, Rawat-i iba tesem nung alirtem shirang aneptsütsü tenüng nung makamaiter tem aja aser

Khristan yimsü agizüktsü mesüzük.

Tai tonglokja alisangi temang anepaluba nung parnok tajangzük angu aser parnok Hindu nung tekülem kidangi maotsü ta yangji alirtemi ashi, ta ken o benoksangi police dang ashi.

Rawat aser par kibongi Dalit nung kibong 230 tashi Khristan yimsü agizüktsü mesüzük, ta Hindustani-i tai tongloktsü.

Temang anepalutsü tenüng nung Rawat-i Dalit nungertem Jalandhar-i anir ao aser yangji Khrista dangi meyipdaksü, ta Hindu activist temi ashir.

Taküm India nung Khristanpur 400 shi timtem ajurua lir

New Delhi, Chiteni/July 18

(Agencies): New Delhi nung amenoka aliba human rights group kati ashiba agi, India nung Khristanpur anema azüdokshiba tali akumer.

United Christian Forum ajanga osang ka agütsüba nung, India nung aliba state 23 nung tamangertem anema mapa tamajung inyakba 400 indang shia liasü.

Taoba küm kasa mapang iba ama tatalokba 274 liasü.

Report ajanga ashiba agi, item tatalokba ya timba Uttar Pradesh nung lir, koba India nung nütsüng yongsük timtiba aliba state lir, kong tamanger temi timtem balala ajuruba 155 liasü.

Tanabuba jenjang nung Chhattisgarh, kong iba ama tatalokba 84, iba sülen Jharkhand nung 35 aser Haryana nung 32 liasü.

Uttarakhand, Tamil Nadu, West Bengal, Himachal Pradesh, Maharashtra, Odisha, Delhi, Andhra Pradesh, Assam, Chandigarh aser Goa amala state tem nung Khristanpur anema mapa tamajung inyakba pongu dang tajemba lir.

June ita India nung Khristanpur temi anogo ka nung lendong timtem asem (average) ajurua liasü.

Item tesemtem nung Khristanpur reshikangshiba tali ajurur, ta UCF ajanga ashir.

Manipur nung Khristanpur 130 shi tepsetogo aser tekülem ki 400 shi raksatsüogo.

Yangji Khristanpur anema police temi ashishitep ken o 63 benoka lir aser pastor 35 pua ayuba lir.

UCF indang National Coordinator A.C. Michael-i ashiba agi, India nung Khristanpur dak timtem agütsüba aser tiazü nung ken o benokba tali akumba indang par teloki Supreme Court nem petition agütsüogo, ta The Christian Post osang ajanga ashir.

Aiben Khristanpur anema ashishitep ken o ya timtem ajurur alirtemi masü saka Hindu nationalist group ama third party temi benoker, ta Michael-i ashi.

Michael-i item tatalokba asadangtsü asoshi retired senior police officer tem ajanga Special Investigation Team ka tentetsü akhanger.

"Lokti ajanga azüdokshia mapa tamajung inyakba nung shilem agirtem molungjang nung tetsübo aitdaksütsü asoshi ozüng balaka benoka amshitsü mapang tongja tongogo," ta pai ashi.

India nung 2021 ya Khristanpur asoshi tamajungtiba küm liasü aser iba mapang Khristanpur anema mapa tamajung inyakba 486 liasü.

"India tesem balala nung item tatalokba ya ajak nung amai religious extremists aliba vigilante telok temi sarasademsü adenshia aliba tesemi nungboka aitba mesüra tashiyim amshia tamangba yimsü melendaksüba nung dena alir südi ta temolung melemi alirtem lungbang," ta iba küm UCF report ajanga shia liasü.

Aibelener tem memerenshiba ajanga Khristanpur timtem tali ajurur, kechiaser iba amala telok temi tamangertem amokmerener, sarasadema aliba nisungtem dak züka merenshir aser tashiyim amshia tamangba yimsü melendaksü ta tai tonglokja police nem agütsür, ta UCF ajanga ashi.

ANO GO ABEN TSÜNGREM DEN

RARABA SOBUTSÜ

"Aser tekümtet merang korang, aser tanela nok, koha Tsüngrem O lir itemji agiang"

- Efesa 6:17

Khristan ka asoshi Laishibaji nok o nü tajungtiba lir. La; azüngbaji dang masü saka Tsüngrem O asen temulungiang nung miima rizünga ayutsüla.

Pauli ashibaji, asenok asoshi raraba sobutsü tajungtibai Tsüngrem O, koba tanela nok lir ibaji sobutsüla. Dawidi yamai Tenüngsang Ken 119: 11 nung shia angur: "Ne O kü mulung nung rizünga lir," Tsüngrem Oji anatsü nok, aser mojing den raratsü tajungtiba sobutsü lir.

Tatishitsü agi: Kodang Yisu Khrista arem nung mojingi atidang, idangji Pai Lai tapet agiteta temenen den rara aser takok anguba yamai angur: "Ya zülua lir, nisungi chiyongtsü agidangbo taküm malir. Ano ya zülua lir, nai Kibuba ne Tsüngrem tatidang... kechiaser ya zülua lir, Nai Kibuba ne Tsüngrem külemang.." (Mathi 4:1-11). Temenen tatidang madak takok angutsü sobutsü tajungtibaji Tsüngrem O lir.

Kechi tia nung lidir liang, aseni teti Tanelar sobutsüji sobur Tsüngrem tenüng nung aotsüla.

SARASADEM:

Takoker Khristan taküm ka alitsü ni Ne O nung tera yangdi. Amen

Indonesia nung Muslim nungeri Khristanpur nem ano timtem agütsür

Surabaya, Chiteni/July 18

(Agencies): Police temi repranga lia North Sumatra Province, Indonesia nung July 2 nü Muslim nung telok kati tekülem agia aliba senshidaksü aser Muslim nung timba aliba tesem ka nung kodasür tekülem ki alitsü ta asüngdanga liasü.

Provincial capital, Medan anasa Setia village, Binjai Kota Sub-District, Binjai kübok Setia yimtsüng nung café ka nung Mawar Sharon Church (Gereja Mawar Sharon, GMS) arogopur adenshia lia iba ama timtem ya ita ana nung tanaben ajurur alitsü.

Arogo anema longkak aitba sülen hijab inoka aliba Muslim tsür temi iba tekülem nung timtem agütsüba video ya social media nung prokshia liasü. Police ka anasa nokdaker lai ola tulu adoka Khristanpur tekülem agütsü memolungba o jembia liasü.

Iba video ya Instagram nung permadiaktivis2 ajanga July 6 nü upload asü, kong lai Muslim nung timba aliba tesem nung Khristanpur tekülem sentong agütsü ta asüngdanga itemji anendaksütsü par mapa lir, ta shia liasü.

"Nenok nütsüng ajema alirtemi teti akumtsüboa amshitsü masüngdangtsüla. Sorkar ozüng agi melaba ama asenok kati ka akumtsübotsü. Ozüng nung ano aibelenra kechi atema ozüng yanglutsü? Onoki tetsüngtai ia aiben jembigo saka parnoki mapa kuma meinyak," ta lai ashi.

Iba post indang commentary section nung Abu Janda ta ajaba religious rights activist

Permadi Arya-i tekülem sentong meinprongba nung tai pua liasü.

"Ajungbena parnok arua kechiba Muslim nung timba aliba tesem nung parnoki tekülem sentep agir ta asüngdang. Muslim nung aliba tesem nung kodang nungi Muslim nung masüba nüburtem tekülem magidaksür?" ta Arya-i zülü.

Indonesia indang Joint Ministerial Decree of 2006 ajanga teti asoshi tekülem sentong agütsü tesem atema dang temelaba nüngdak ta shia lir, anungji kibong tem nung tekülem sentep agiba maden, anungji iba ozüng ya café mesüra kidang mamshir, ta Arya-i zülü.

"The Joint Decree of the Two Ministers, Chapter 1, Article 3 nung tekülem ki yanglutsü atema dang temelaba nüngdaker. Nisung aliba kidang, dokan aser café nung tekülem agütsü temelaba menüngdak," ta pai zülü.

Iba amala ki, café aser dokan nung Muslim nung temia sarasadema takdang ama amshir, aser item atema Muslim nungeri temelaba menüngdaker, anungji Khristanpura kasaji asütsüla, ta pai ashi.

May 19 nüa café ka nung teroto nung tekülem sentong agia alidang Muslim nung nisung 40 shi arua timtem agüja liasü.

Open Doors ajanga alima nung Khristanpur alitsü asoshi linük tamajungtiba 50 asadanga 2023 World Watch List nung Indonesia ya jenjang 33 buba nung lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Reprangshi

(v) ano khen lephsia reprang, ajishi (look around, review)

* Lenmang yanglurtem mapa yimteni **reprangshi**.

Reprepa

(v) o meleptet, o junga madoktet (slurred speech)

* Moaba temang meshitakba agi o **reprepa** jembir.

OLONG PAITEP # 6580

1		2		3		4	
		5		6		7	
8							
		9					
	10						
						11	12
		13				14	
15						16	

TIPILEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. ___ adenshi - (4)
- 14. Tsünüsönbongsü adokdak - (3)

OLONG PAITEP # 6578 TELANGZÜBA

TIPILEN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.

NAI-A YA METETTER MA



2023 nung sen teimtiba aazükba saisapongerji Cristiano Ronaldo lir. Al-Nassr striker Ronaldo-i 'highest-paid athlete' indang Guinness World Record naroküm agizükogo. Portugal nung Ronaldo-i taküm küm tetenzüklen Saudi Arabia-i ao aser Al-Nassr club atema asayar ka aküm. Pai küm aika otsü tasen aika yanglua arur aser arishi küm 38 süaka ano pai otsü tasen ka yanglutetogo. May 1, 2023 matongdang tesüiba ita 12 tsüngda Ronaldo-i \$136 million aazük. Iba ajanga pai Argentina nung Lionel Messi ajangetetogo. 2022 nung Messi ya alima nung 'highest-paid athlete' liasü aser pai \$130 million shi aazük ta Guinness World Records ajanga ashir.

**Mokokchung
Police-i Miim mozü
shibelener 5 apu**



Mokokchung, Chiteni/July 18(TYO):

Mokokchung Police-i July 14 nü Settsü lenjem nung ladanglara garitem soita bushitsüngdang asüba mapang nung Bike(Royal Enfield) number AS03 W 0451 aser Scooty number AS03 AD 7321 nung Ungma nung Artang Ward nung alir Longrimongba jabaso arishi kum 35 tain Imliwapang, Longkong nung Artang ward nung alir Rongsennungba jabaso arishi kum 32 tain Imlichuba, Mokokchung nung Tzusapang sector nung alir Imkongtemsu jabaso arishi kum 47 tain Tsuknungwati aser Mokokchung nungersa Mokokchung yimtak alir Temjenmongba jabaso arishi kum 37 tain Imkongnungsang parnok ket nungi Spasmo Proxyvon Capsule aser Novocoff-CT syrup ngutet.

Iba tatalokba dak ajemdaker Mokokchung Police-i Mokokchung Police Station-2 nung case ka Case number.0031/2023 U/S 21(a) NDPS Act nung zülüoker bushitsüngdang agidagi.

Maneni ano Mokokchung Police-isa July 15 nü Zünheboto district kübok aliba Shoixi nung 3rd mile Thilixu village nung alir Kiyeto Jimo jabaso arishi kum 40 tain Enos K Jimo Brown Sugar/ Heroin bener lia Sangtemla Ward Mokokchung nung apu. Iba tatalokba dak ajemdaker Mokokchung Police-I Mokokchung Police Station-1 nung case ka case number.0015/23 U/S 27 NDPS Act nung zülüoker bushitsüngdang agidagita Additional Superintendent of Mokokchung ajanga metetdaksü.



OFFICE OF THE
MERANGKONG SENSO MUNGDANG
P.O. TULI - 798618
DIST. MOKOKCHUNG : NAGALAND.

TENÜNGSANG AGÜTSUR

- 1. Rev. C. Tongpang & Mrs. Moala na jala **Miss. Maongnaro** B.A. History (Honours) N.U. Gold Medal ngutet.
- 2. Mr. Imtisobu & Mrs. Imoangsu na jabaso **Mr. Nungangkumzuk** HSSLC (Commerce Stream) Exam 2023 nung Governor Award ngutet.

NSSB Exam nung Takok angurtem.

- 1. Mr. Pangerlemba Imsong & Mrs. Dzuthore na jabaso a. **Mr. Chubamongba Imsong**, LDA (Directorate) NCERT Deptt. b. **Mr. Nungshikaba Imsong**, Family Welfare Assistant Deptt. of Health and Family Welfare.
- 2. Mr. T. Takuwati Ao & Mrs. Lt. Lanula na jala **Miss. Temjennungla**, LDA Cum-Computer Assistant (District) Animal Husbandry & Veterinary Sciences.
- 3. Mr. K. Tsuktitoba Ao & Mrs. Moarenla na jala **Miss. Lipoktila**. LDA Cum-Computer Assistant (Directorate) Public Health Engineering Deptt.
- 4. Mr. Waimongba Lkr & Mrs. Tialila na jabaso **Mr. Watilemba**, LDA Cum-Computer Assistant (Directorate) Office of the Chief Electoral Officer.

Tsüngremi tarutsü nunga nenok wadang ano maneni takok manung aniangma.

Sd/-
Imlitoba Imsong
President
Merangkong Senso Mungdang

Sd/-
Takomangyang
Secretary
Merangkong Senso Mungdang

Office of the
Longjang Senso Mungdang

TETUSHI AGÜTSÜR

Longjang Senso shirnokisa pei wadang nung temaba jenjang tongtetogo, aser ano 2022-2023 NPSC ajanga agiba Common Educational Service Examination nung takok tajung ngutetogo, nenok ajak nem Longjang Senso Mungdangi konang tetushi agütsür. Tarutsü mapang ajak nung takok aser temoatsü nung len aniang ta sarasademtsür.

- 1. **Dr. Anungla Pongen**, D/o Mr. & Mrs. Ngangnen Pongen, on being conferred the Degree of Doctor of Philosophy (Ph.D) in Zoology (Nagaland University, Lumami).
- 2. **Mr. A. Limasunep Jamir**, S/o Mr. & Mrs. Late Ayutemjen Jamir on being promoted to Additional General Manager, Nagaland State Transport, Dimapur, Nagaland
- 3. **Dr. Nungshikokba Imchen**, S/o Mr. & Mrs. Imtilepzuk Imchen on being promoted to Deputy Director, Health & Family Welfare Department.
- 4. **Mr. R. Bendangtoshi Pongen**, S/o Mr. & Mrs. Lt. R. Sosang Pongen promoted to Asstt. Headmaster under School Education
- 5. **Mr. Sangyutemjen Jamir**, S/o Mr. & Mrs. Temnasangba Jamir, promoted to Asstt. Headmaster under School Education
- 6. **Mr. Yarangchang Imchen**, S/o Mr. & Mrs. Lt. Samanenba Imchen, promoted to Asstt. Headmaster under School Education
- 7. **Mr. Imliyanger Pongen**, S/o Mr. & Mrs. Lt. Imsutemjen Pongen, promoted to Asstt. Headmaster under School Education
- 8. **Mr. T. Lanu Imchen**, S/o Mr. & Mrs. Lt. R. Tali Imchen, on being appointed as Vice-President, North East Sports Karate Federation (NESKF)
- 9. **Miss Katila Jamir**, D/o. Lt. Imli Jamir for securing the post of Lecturer in Architecture under Technical Education.
- 10. **Miss Tainla Longchar**, D/o. Mr. & Mrs. Shilumeren Longchar for securing the post of Post Graduate Teacher in English under School Education.
- 11. **Miss Temjenjungla Longchar**, D/o. Mr. & Mrs. Longchenti Longchar for securing the post of Post Graduate Teacher in English under School Education.
- 12. **Miss Tekalemla Longchar**, D/o. Mr. & Mrs. C Bendang Longchar for securing the post of Post Graduate Teacher in English under School Education.
- 13. **Miss Yashiyala T Imchen**, D/o. Dr. & Mrs. A Tekatemsu Imchen for securing the post of Post Graduate Teacher in Mathematics under School Education.
- 14. **Mr. Aochuba Jamir**, S/o. Mr. & Mrs. Lt. Merangjenba Jamir for securing the post of Post Graduate Teacher in Physics under School Education.
- 15. **Mr. Akumtoshi Aier**, S/o Mr. & Mrs. Imtinungsang Aier for being selected to the posts of (1) AG3 General at FCI (2) SSC CGL 2022
- 16. **Mr. Wapangtoshi Pongen**, S/o L. Ngangnen Pongen for securing the post of LDA cum Computer Assistant under Education Department.

Sd/-
M. Temjen Jamir
President

Sd/-
T. Imti Pongen
Secretary LSM

Russia-i Ukraine nung rongnendak ki o jen raksatsü

Kyiv, Chiteni/July 18 (Agencies): Ukraine kübok anüolen tip tzükümlen Russia-i drone aser missile amshia amakba sülen rongnendak aser industrial infrastructure tem raksatsüogo, ta ketdangsürtemi Mongolbarnü metetdaksü.

Moscow-i jangotzü belenshitsu atema tenangzüktepba yanglur aliba nungi atsüingnba sülen ghonda ishika lir Ukraine nung tesem kar makogo.

Odesa nung Black Sea nungi khaketa yokba Kalibr missiles trok air defences-i raksatsüogo, ta Ukraine indang southern command-i sangdong ka ajanga metetdaksü.

Kasa mapang nung Odesa temeket nungsa tziyüm nungi yokba Iran nung yangluba Shahed explosive drone metsür-ka raksatsüogo.

"Tiamaka missile aser drone khazüka yokba nungi merang insangtem aser item ya khazüka yokba mapang wave agi port infrastructure facilities aser nija ki aika raksatsüogo," ta kasa sangdong ajanga metetdaksü.

Ajisüaka osang nung port infrastructure facilities mesüra ki tem ya koba tesem nung raksa iba indang tejangja magütsü.

Iba lendong nung tambur ka par kidang yiru aser tang temang anepaludar, ta southern command-isa metetdaksü.

Southern Ukraine kübok Odesa tesem nung maritime terminals tem amenoka lir aser Moscow aser Kyiv na jangotzü belenshitsu atema tenangzüktepba yangluba kübok item ya kanga tongtipang liasü.

Maneni linük anütoktip tzüküm nung amenoka aliba Mykolaiv yimtia Russia nungertemi maka liasü, ta local governor Vitaliy Kim-i ashi.

Iba yimti nung tesem ka nung mi adok, ajisüaka mapang tatsüka lir temsepa liasü, ta pai Telegram ajanga metetdaksü.

Iba lendong nung nisung ka danga asüba osangbo tang tashi agüja mali.

Mykolaiv ya Moscow-i atsünger aliba Crimea nungi kilometres 170 (100 miles) shi pilar Black Sea tzüküm nung amenoka lir.

2022 küm February ita nungi tenzüka Russia-i Ukraine maka arudar aser Russia nung sepaitemi iba tesem ya mapangshi makdar.

Odesa military region indang otongdar Sergiy Bratchuk-i taoba mapang iba tesem nung air defences activate sütsüba indang metetdaksü.

Russia-i Ukraine anüolentip nung tesem balala drone tem amshia maka arudar, ta Odesa region military administration tekolakba Oleg Kiper-i Telegram

ajanga metetdaksü.

Paisa iba tesem nung alirtem dang tejenokdak atsükoka alitsü atema tetuyuba agütsüogo.

Maneni Mykolayiv, Kherson, Zaporizhzhia, Donetsk, Kharkiv, Dnipropetrovsk, Poltava, Kirovograd, aser Cherkasy tesemtem nunga air alerts sangdonga liasü.

Taoba küm tetenzüklen nungi Russia-i Ukraine amak tenzüka sülen Ukraine indang Black Sea ports tem warships agi nokdang liasü. Ajisüaka 2022 küm July ita jangotzü belensü atema tenangzüktepba yangluba sülen rongtem linük balalai aotsü atema lenmang sadema lapokja liasü.

Taoba küm tenangzüktepba yanglur aliba ya atsülangtsü asoshi Russia-i memolungba sülen Hombarnü tembangogo.

Jangotzü belensü atema tenangzüktepba yangluba mapang Russia nungia chiyongtsü aser fertilizer belensü asoshi tenangzüktepba danga ka yanglua liasü, ajisüaka Russia-i ashiba agi iba tenangzüktepba ya tang tashi benoka inyaksangshi masür.

Russia-isa, parnok den tenangzüktepba yanglur aliba ya mapa küma inyaka aoba sülen parnoki maneni jangotzü belensü atema tenangzüktepba yanglur aliba nung shilem agitsü ta metetdaksüogo.

OFFICE OF THE YAONGYIMSEN VILLAGE COUNCIL

TENÜNGSANG AGÜTSÜR

Yaongyimsen Village Council ajanga item tatidang balala nung takok angurtem nem tenüngsang agütsür.



MISS WATISANGLA D/o Mr. Tiameren & Mrs. Lanuienla, NBSE-i achaayanga agiba HSLC Examination 2023 nung Top 5 jenjang ajangzüktepba.



MISS TIARENLA D/o Mr. Imlinungsang & Mrs. Yashimongla, NBSE-i achaayanga agiba HSLC Examination 2023 nung State Subject Topper in Social Science jenjang ajangzüktepba.



MISS WANGSHIRENLA LONGKUMER, D/o Mr. Odikokba Longkumer & Mrs. Moasenla Imsong, Kohima Science College, Jotsoma nungi B.Sc. Computer Science Honours nung Gold Medal jenjang ajangzüktepba.



MISS ALEMENTOLA IMSONG, D/o Mr. R.C.Tocy & Mrs. Temjenmongla, NPSC, CESE tatidang nung Assistant Professor in Philosophy under Higher Education jenjang anguba.



MISS P.TEMJENNUNGLA IMSONG, D/o Lt. I.Panger Imsong & Mrs. Alikangla, NPSC, CESE tatidang nung Post Graduate Teacher (PGT) in Education under School Education jenjang anguba.

Iba dak alaka senso nübur rongnungi shirnokisa tatidang balala nung takok nguogo, nenok ajak nem Yaongyimsen Village Council-i tenüngsang agütsür.

Maneni nenok taküm aser wadang ajak nung Tsüngrem lenisüba denang ta sarasademtsür.

Sd/- NUNGSANGTOBA Chairman Yaongyimsen Village Council	Sd/- TONGPANG Secretary Yaongyimsen Village Council
---	--

Pakistan kübok Peshawar nung bomb apok, nisungti yiru

Peshawar, Chiteni/July 18 (Agencies): Pakistan northwest tsütsü Peshawar yimti nung paramilitary forces tem mena aliba truck ka anasa takum bendanga agütsür bomb pokloktsüba lendong nung nisung ti yiru, ta police temi ashi.

Mongulbarnü iba lendong ya Afghanistan den arütsüa aliba Khyber Pakhtunkhwa province yimtiba, Peshawar tezülen Hayatabad nung kanga mazüngi aliba lenmang ka nung atalok.

Tawa tentetba telungpur telok, Tehreek-e-Jihad Pakistan ajanga iba lendong agütsüba tenüng agiogo. Taoba hopta kasa telok yagi linük southwest tsütsü Balochistan province nung mitkartem aliba tesem ka maka sepai pezü tepset.

Hayatabad Medical Complex nung medical director Shehzad Akbar Khan-i ashiba agi, Mongulbarnü iba bomb lendong atalokba sülen nisung ana temang anepalutsü atema mozüki bushia aru. Tenaprong temang tajungba lir. Tanüngba yirur alirtem ya military hospital kati anir ao.

Iba bomb ya paramilitary Frontier Corps indang gari ka nung pokloktsü, ta police ketdangsür temi ashi.

Iba bomb yagi truck ya kanga sashia raksatsü aser anasa civilian tem mena aliba gari nunga kongshi. Lendong agütsür ya tepsetogo.

Item telok nungi züngsemtem ya kidanger Afghanistan nung jenoker, ta taoba hopta Pakistan indang army ajanga shia liasü. Ajisüaka lendong ana nung Pakistan sepai 12 asüba sülen parnoki telangzüba sashi-sashia agütsütsü, ta amokmerena liasü.

OFFICE OF THE LONGKONG WATSÜ TELEN
B.P.O LONGKONG, P.O CHUCHUYIMLANG - 798614, MOKOKCHUNG: NAGALAND

TENÜNGSANG AGÜTSÜR

 Kr. Nungshitola M Longkumer	 Kr. Wapangnungla Longkumer
---	--

NPSC Common Educational Services Examination 2023, tatidang nung kongro Nungshitola M Longkumer D/o Mr. Masatuba Longkumer aser Mrs. Yangerjungla Jamir, na jalai PGT, Political Science nung takok tajung ngutetba aser kongro Wapangnungla Longkumer D/o Mr. Sentimeren aser Mrs. Tiakala na jalai NSSB, Combined Staff Recruitment Exam nung LDA cum Computer Assistant (District) Under School Education nung ajangzüktepba asoshi Longkong Watsü Telen-i kanga pelar aser Tsüngrem tenüng asanger.

Sd/- Wt. Y.Amongla Tir LWT	Sd/- Wt. T.Aienla Jamir Tongti Zülur LWT
--	--

TEPELA LEMSATEPER



Aso
01-10-1926

Asü
08.07.2023

Onoki teti meima aliba obala, Asür **Purneken Longchar** (Aonokpu) iba ilma nungi pilaba mapang ozü kibong dang yimya balala nung temeim sayuba atema pelaba lemsateper. Nenok kija, kibong, tembar, kidanger, arogo, yimer-yimsanger aser temolunger shirnokisa sarasadem, shisatsü, nübu aser rongsen agi ozü den yaritepogo, nenok ajak dang pelaba lemsateper. Nenok kija shia dang pelar ta tepang agi ashitsü tamakoktsü asünung iba sapang ajanga ozü temolung taroktiba nungi tepela lemsateper agizükangma. Onok timtem nung aliba mapang züngdangtsü mokoki ozü asoshi mapa tajung inyakba aser temeim sayuba ozüki kodanga meyipa magütsüba, saka Tulusang Tsüngremi nenok ajak moajang ta sarasademtsür.

~ Temeim kinungtsü, chirnur, semchir, tanabuba semchir aser kinungertem.

UNGMA TANUJANG KIN TENÜNGSANG AGÜTSÜR

Ungma Tanujang Kin ajanga item züngsemtem pei tenzüka wadang aser tetoktepba balala nung takok tulu nguteta kin nem tenüngsang bener arutsü nung kin-i peleba metedaksür.

1. Mr. Imotiba Longkümer aser Mrs. Onentila Jamitsür jala Smt. Asasola Longkümer, Assistant Registrar of Co. Operative Societies, Nagaland, Kohima mendeni ajungket
 2. Mr. Longrituba Longkümer aser Mrs. Süpongangla Jamitsür jabaso Shri. Watikaba Longkümer, Sr. Head Assistant (Police Department) mendeni ajungket.
 3. Mr. Longrilemba Longkümer aser Mrs. Pangerwangla Jamitsür jala Miss. Imlienla Longkümsür NPSC (CESE, 2023) tatidang nung Post Graduate Teacher in Mathematics jenjang ngutet.
 4. Mr. Meputiba Longkümer aser Mrs. Tushimenla Jamitsür jala Miss. Temjennaro Longkümsür NSSB tatidang nung LDA-cum-Computer Assistant (District) under Industries & Commerce jenjang ngutet.
- Teyanglur Tsüngremi maneni ner wadang moajangma.

Tanujang Kin tenüng nung:
1. Lanusüngküm Tatar
2. Rongsenpokba Tatar



La Palma, Spain kübok Canary Island nung aliba Tijarafe tenem nungi mokozi adoka aliba noksa nung angur. Hopta tatemlen iba asetkong nung morok mi agi ali 5,000 hectares (12,355 acres) rongogo, kong züngsa-rusaba ajanga Hombarnungi Bodhbar tsüngta temperature 40C (104F) dang tatsükba akumtsü ta ashir.

1buba Inter-College Championship Trophy osang



Dimapur, Chiteni/July 18 (TYO): 1buba Inter-College Championship Trophy tenzüker tanabuba anogo Nagaland Cricket stadium nung mezüngbuba asaya nung Public College of Commerce-i wicket 8 agi JN Aier College kokogo.

Asaya nung mezüng batting amenba sülen JN Aier College-i over 19 nung run 90 yanglu. Parnok rongnungi Ikumba-i dang tera junga asaya-a run 16 yanglu. PCC bowler tem rongnungi Hriday-i wicket 3 aser Saurav, Banti aser Vijay nungeri wicket anana agia liasü.

Run arishiba mapang PCC-i run 90 wa wicket 2 out ser over 12.2 nung menepa asaya akok. Parnok rongnungi Deepak Gond-i run 46 yanglu aser pa nem Man of the Match naroküm agütsü.

Tanabuba asaya NIT-i run 84 agi koka liasü. Mezüng batting amenba sülen NIT-i over 25 nung asayar 5 out ser run 236 yanglu. Parnok rongnungi Yuvraj Kumar-i run 96 aser Deepankal-i out mesüi run 58 yanglu. SJU atema Sulanthung-i wicket ana aser Kitiki-i wicket ka agi.

Run arishiba mapang SJU puri takokba tashi merangdang ajisüaka parnoki over 25 nung asayar 7 out ser run 152 dang yangluteta liasü. Parnok

rongnungi Sulanthung-i run 43 aser Mhachan aser Prince nati run metsürpezüzi yanglua liasü. NIT atema Satyapal Yadav-i wicket 2 aser Sami aser Ganta nati kaka agia liasü. Iba asaya atema NIT nung Yuvraj Kumar nem Man of the Match naroküm agütsü.

Sovima Cricket Ground nung mezüngbuba asaya Dimapur Government College-i run 126 agi kokogo. Toss koka mezüng batting amenba sülen DGC-i over 25 nung asayar 6 out ser run 237 yanglua toktsü. Parnok rongnungi Alok Sharma-i run 82, Suraj Sharma-i 57 aser Akash-i run 45 yanglua liasü.

Run arishiba mapang Tetso College-i junga masayatet aser over 21.2 nung parnoki asayar ajak out ser run 111 dang yangluteta liasü. Parnok rongnungi Elow Nelina-i run 18 aser Yhumkenye Tep-i out mesüi run 42 yanglu.

Asaya atema DGC nung Alok Sharma nem Man of the Match naroküm agütsü

Tanabuba asaya nung Salt Christian College (SCC)-i wicket 4 agi Unity College koka liasü. Asaya nung Unity College pur mezüng batting amen aser parnoki over 25 nung asayar 5 out ser run 120 yanglu. Unity

College atema opener Shabib Akhter (16) aser Prakash Mahela (24) na sentepa run 38 yanglu aser Somi Yimchunger (15), Md Shakir Ahmed (19) Anurag Gupta (11) nungeria teyari agüja liasü.

Asaya tanabuba shilem nung SCC puri over 24.1 nung arierna dang Unity College-i yanglur aliba run menepa liasü. Shabib Akhter (wicket 3) aser Vishnulana (wicket 2) nati Unity nem timla agütsü ajisüaka Martin aser Karan nati out mesüi run 36 aser 19 yangluba ajanga SCC puri tatembangbuba over nung run menepa arishiba nung teyari tulu agüja liasü. Parnok rongnungi captain Dip Borah-ia run 24 yanglu.

Iba asaya atema Martin nem Man of the Match naroküm agütsü.

JULY 19 NÜ ASAYA:
Nagaland Cricket stadium
 8:30 AM: Dimapur Government College vs Salt Christian College
 1:00 PM: Unity College vs Tetso College
Sovima Cricket Ground
 8:30 AM: NIT Nagaland vs J.N Aier College
 1:00 PM: Public College Dimapur vs St. Joseph University.

Pezübuba Ashes Test atema Ollie melen Anderson shimogo

Chiteni/July 18, 2023 (Agencies): Australia den pezübuba Ashes Test atema England-i team nung Ollie Robinson melena fast bowler James Anderson shiogo, ta linük indang cricket board (ECB)-i Hombarnü sangdong ka ajanga metetdaksü.

England aser Australia na tsünga Test pezübuba Bodhbarnü Old Trafford nung tenzüksü koba Anderson indang home ground lir. England team asoshi iba asayamung akoktsü atema iba Test ya kechisüdir süaka akoktsü nüngdaker.

Iba asayamung nung tang tashi nung Australia-i asaya ana aser England-i ka koka lir aser asaya ana anunga aliba nung ka danga draw süra Australia-i iba

asayamung akoktsü. Anderson ya England nung asayatem rongnungi Test asaya nung wicket (688) timtiba agiba asayar lir. Pa Test asembuba nung m a s a y a d a k t s ü i anisüngzükdaksü, keyiyong arishi küm 40 tain asayar yagi imlaba ama junga masayatet aser Test asaya ana nung pai wicket asem dang agir lir.

Ajisüaka tasembuba Test asayaba mapang Robinson yiruba ajanga tang ano Anderson team nung aniokogo. Robinson-i tasembuba Test nung mezüngbuba innings nung dang over 11.2 ona liasü. Pa tanabuba innings nungbo bowling maon aser Chris Woakes o Stuart Broad nati ball tasen ona liasü. Robinson-i pa Manchester

nung asayatsü atema anema lir ta Wisden column nung zülujaka England-i iba asaya nung Anderson asayadaksütsü asoshi telemteba agiogo. Kasa mapang nung Mark Wood aser Chris Woakes nata team nung züngoksemogo. Tasembuba Test nung tenati kanga junga asayaba ajanga team nem takok agüja liasü.

Maneni iba asaya nung spinner Moeen Ali shiba tanabuba inings nung one down nung batting mena liasü pa maneni tasembuba nung batting amentsü imlar.

England team: Ben Duckett, Zak Crawley, Moeen Ali, Joe Root, Harry Brook, Ben Stokes (captain), Jonathan Bairstow, Chris Woakes, Mark Wood, Stuart Broad, James Anderson.



Indria Gandhi Stadium, Kohima nung asayatsü aliba State Level Under-14 Taekwondo Tournament nung shilem agitsü atema Mokochung District Taekwondo Association (MDTA) team tashi tait ka renema lir. MDTA team nung tebur trok aser tetsür pezü densema lir aser parnok ya Technical Instructor Jongmasutsung, Manager aser Instructor Imjunglong Coach nati anir aotsü. State Level Under-14 Taekwondo Tournament ya July 20 aser 21 nü asayatsü.

Jamshedpur FC-i Serbia nung asayar Alen Stevanovic alizükogo

Chiteni/July 18, 2023 (Agencies): Jamshedpur FC-i Serbia nung international asayar Alen Stevanovic den küm ana atema tenanzüktepa yangluba sangdongogo.

Arishi küm 32 tain ya mezüngbuba Italy nung Inter Milan youth team nung asaya tenzüker aser iba mapang coach Jose Mourinho-i pa senior team nung asayatsü atema maongka agüja liasü.

Mourinho-i anir 2009-10 season nung Inter-i asayamung tongtibang asemprongla akokba squad nung Stevanovic densema liasü. Iba küm parnoki Serie A Scudetto, Coppa Italia aser UEFA Champions League koka liasü. Maneni pa Italy nung Torino FC, Palermo, SSC Bari aser Spezia nungia asayaogo.

"Jamshedpur FC nung densemba ya tetushi tulu lir. Ni club aser fan tem indang aika angashiogo aser ni iba yimti-i arua asayatsü yongya atar," ta Alen Stevanovic-i ashi.

"Iba club yagi taoba ISL Shield kokogo aser fan temi pusemba den asayaba yimya shitak benoka asayara iba club maneni temaba jenjangi atutsü ta ni amanger. Ni coaching staff tem den inyaksü yongya atar aser kü tajangshibatem aser team quality ajak meyokteper

club maneni temaba jenjangi atutsü ta amanger," ta pai shisem.

Alen-i, Palermo nungi asayaba mapang Serie B kokogo aser Partizan Belgrade nungi asayaba mapang Serbian Super Liga (2016-17) aser Serbian Cup (2015-16, 2016-17) dena kokogo. Maneni pa World Cup Qualifiers nunga Serbia team nungi aiben asayaogo. Tesüsa pa lenisüba nung 2022-23 season nung FK IMT-i Serbian First League trophy kokogo.

"Alen alizükba ya Jamshedpur FC atema kanga tajung lir," ta Jamshedpur FC coach Scott Cooper-i ashi.

"Pa Europe aser Asia nung club aikati aginüa liasü aser arishi küm 32buba nungdang pa onok den densemba ya onok atema kanga jangrademtsüka lir.

"Alen-i tajangshiba aika bener arutsü. Pa temaba jenjang nung asayaba asayar ka lir saka pa kanga dang ajemaluba nisung ka aser professional ka lir. Alen-i Asia nung mezüngbuba Jamshedpur shimba atema kanga pelar aser fan temi pa dak keta aliba sempet aser akoktsü asoshi tejangraba aliba ya jangradema reprangtsü," ta Cooper-isa shisem.

DBHSS Bhandari-i Open Basketball tournament kokogo



Dimapur, Chiteni/July 18 (TYO): 45 Assam Rifles E Coy. Bhandari-i ayongzüka DBHSS nung Open Basketball tournament ka July 11 nungi 16 tashi asayaogo.

Iba asayamung ya Don Bosco Higher Secondary School (DBHSS)-i akok aser Net Rippers team tanabuba jenjang nung tembanga liasü.

Asayamung akokba team nem takok marok aser kuli kaket den senpet sen 20,000 agütsü aser runners-up team nem senpet sen 5000 agüja liasü.

Sempet lemetsüba mapang Maj Rajat Yadav-i asayamung nung shilem agi team 9 dang yimya tajung sübatsü aser pei sempet aser peisasa dak temulung lemteta tetsükdaksütem ajak koktetyonga aotsü ajungshia liasü.

Kasa mapang nung iba amala asayamung tajung ayongzüka lanurtem den sabang tajung agütsüba atema Village council züngsemtem, lokti lenirtem aser nüburtemi 45 Assam Rifles dang kanga pelaba lemsatepa liasü.

BILEMDANGANG

"Tasü aitbaji kecha metsübuba masü, tetsübu kokteta inyakba."